

**Inatsisartut Peqqissutsimut Ataatsimiititaliaata**

**Peqqinnissaqarfiup aqunneqarnera, aqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. xx, xxxx 2010-meersoq**

**pillugu**

**ISUMALIUTISSIISSUTAA**

**Aalajangiiffigisassatut siunnersuutip aappassaaneernejarnerani saqqummiunneqartoq**

Inatsisartut Peqqissutsimut Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Astrid Fleischer Rex, Demokraterne  
Inatsisartunut ilaasortaq Malik Berthelsen, Siumut  
Inatsisartunut ilaasortaq Siverth K. Heilmann, Atassut

Inatsisartuni siullermeernejarnerata kingorna Inatsisartut Peqqissutsimut Ataatsimiititaliaata siunnersuut misissorpaa.

**Siunnersuutip imaa aamma siunertaa**

Inatsisissatut siunnersuutip siunertaraa tarnip pissusaanik ilisimasallit aamma peqqinnissamut tunngasutigut sullissisut pillugit aalajangiinissamut malittarisassanut tunngassuteqartunik Naalakkersuisut aalajangersaanissaamut piginnaatinneqarnissaat. Taaguutit illersugaanerannik, tarnip pissusaanik ilisimasallit aamma peqqinnissamut tunngasutigut suliallit pisussaaffiinik, napparsimasut pisinnaatitaaffiinik, nakkutilliinermik, pineqaatissiinissamut aalajangersaasinnaanermut aamma pissutsinik allanik tarnip pissusaanik ilisimasalinnut susassaqarfigisaminnillu suliaqarnerannut pingaaruteqarsinnaasunik aalajangersakkat imaqarsinnaapput.

**Inatsisissatut siunnersuutip Inatsisartuni siullermeerneqarnera**

Inatsisissatut siunnersuut Naalakkersuisunit saqqummiunneqartoq ataatsimut isigalugu partiinit tigulluarneqarpoq, ataatsimiititaliamilu suliassanngorlugu innersuussutigineqarluni.

**Inuit Ataqaatigiit** Naalakkersuisunit siunnersuut ataatsimut isigalugu isumaqatigaat, aammali isumaqarlutik najukkami pinaveersaartitsinermut ataatsimiititalianik pilersitsinissaq naleqquttuusooq, ajornartorsiutit pilersut aaqqiivigineqarnissaannut najukkami oqartussaasut peqatigiinnikkut pitsaanerpaamik nalilersorsinnaassammatigit.

**Siumumit** Naalakkersuisunit siunnersuut ataatsimut isigalugu isumaqatigineqarpoq. Taamaattorli Siumumit erseqqissarusunneqarpoq tarnip pissusaanut tunngasunik maalaaruteqartoqartillugu tarnip pissussiinut ilisimasalinnik pissutsini pineqartuni Nunatta Nakorsaanerata siunnersorteqartarnissa.

**Demokratit** Naalakkersuisunit siunnersuut ataatsimut isigalugu isumaqatigaat, kisiannili allanik katsorsaariaaseqartut amerlavallaannginnerannik Naalakkersuisut oqariartuutaat innersuussutigalugu. Demokraatit isumaqarput napparsimasut amerlasuut allatut katsorsartinnissaq toqqartaraat.

**Atassutip** Naalakkersuisunit siunnersuut ataatsimut isigalugu isumaqatigaa, pineqaatissinneqarnermilu akiliitsitsissutit Nunatta karsianut nakkartinneqartarnissaat immikkut ajunngitsuututut erseqqissaatigalugu.

**Tusarniaanermi akissutit**

Tusarniaanermi akissutit Inatsisissatut siunnersuummut ilanngunneqarnikuupput, tamanalu Inatsisartut Siulittaasoqarfianit ilusiliussassatut piumasaqaatinut naapertuuppoq. Tusarniaanermi akissutit tusaatissatut tiguneqarput.

**Inatsisissatut siunnersuutip teknikikkut ilusilerneqarnera**

Ataatsimiititaliaq Inatsisartut Inatsisissanut Nalilersuisarfianit inatsisissatut siunnersuummi amigaataasut naleqqutinngitsullu pillugit allakkiamik tigusaqarnikuuvoq. Allakkiaq isumaliutissiisummut uunga ilanngunneqarpoq. Ataatsimiititaliap naammagisimaarlugu maluginiarppaa Naalakkersuisut naqqiuteqarnermikkut allakkiami inassutigineqartut naapertorlugit siunnersuut iluarsaassimammasuk. Aamma naqqiut allakkiamut naleqqiullugu suli ajornartorsiutinik pilersitsissappat siunnersuutip naggataarutaasumik suliarineqarnerani tamanna Ataatsimiititaliamit uparuarneqarumaarpoq.

### **Siunnersuutip aningaasaqarnikkut kingunerisassai**

Nalinginnaasumik nassuiaatini allaqqavoq siunnersuut akuerineqarpat tamanna aningaasaqarnikkut kinguneqarnavianngitsoq. Ataatsimiititaliaq isumaqarpoq tamanna tunngavigalugu allatut naliliinissamut pissutissaqanngitsoq. Taamaalilluni Ataatsimiititaliap tatigaa apeqqut tamanna Naalakkersuisunit misissorluarneqarsimasoq, tamatumalu malitsigisaanik aningaasaqarnikkut sunniutaasinnaasut pilersinnaassanngitsut. Naatsorsuutiginnngisamik pisortat aningaasiviinit aningaasartuuteqarnerunissaq kingunerissappagu, aningaasartuutit tamakku aningaasaliissutaareersunit akilerneqartassapput, tamannalu pissappat suliniutit allat pingaernerutinnginneqarnissaannik kinguneqassaaq.

### **Ataatsimiititaliap inatsisissatut siunnersuummik suliarinninnera**

Peqqissutsimut ataatsimiititaliap Naalakkersuisunit inatsisissatut siunnersuut peqqinnissaqarfimmi maanna nutarterinermut ingerlasumut 1. januar 2011-mi timitalerneqartussamut naapertuuttut isigaa.

Taamaattorli Peqqissutsimut ataatsimiititaliap maluginiarppaa siunnersuutip nalinginnaasumik nassuiaatitaani Naalakkersuisut ima oqariartuuteqartut:

*”Kalaallit Nunaanni allatut nakorsaariaasillit maanna ikittuinnaasut oqaatigineqassaaq. Allatut nakorsaariaasillit, pisariaqalissappat maleruagassiornissaannut utaqqinnissaat pissusissamisuuksaaq.”*

Ataatsimiititaliap isumaqatigiittup Naalakkersuisunut inassutigaa inatsisissatut siunnersuummi pineqartut allatut katsorsaasartut maleruagassiorneqartariaqartut. Tassunga atatillugu Peqqissutsimut ataatsimiititaliap Naalakkersuisut nalunaaruteqassasut inassutigissavaa, taamaalillutik allatut katsorsaasartut allatullu katsorsartittartut pineqartumi maleruagassiaasunut naapertuisinnaassammata.

**Tamanna tunngavigalugu Peqqissutsimut ataatsimiititaliap siunnersuut taamaatut isikkoqartillugu akuerineqarnissaa innersuussutigaat.**

Taamatut oqaaseqarluni Inatsisartuni Peqqissutsimut ataatsimiititaliap inatsisissatut siunnersuut Inatsisartuni aappassaaniigassanngortippaa.

---

Debora Kleist,  
Siulittaassup tullia

---

Astrid Fleischer Rex

---

Malik Berthelsen

---

Siverth K. Heilmann